

հապետ վրդ. և Ամգեցի աչքէ կ'անցընեն Աստուածաշունչը, ինչպէս վերջինս նոյն օրուան թուականով գրած է իր Օրագրութեան մէջ. «զնահապետ վարդապետի զԱստուածաշունչն սէյր արաք» (թղ. 68բ):

Ամգեցիի Օրագրութեան երկու հատուածներէն, զորս առաջ բերինք վերև (էջ ԿԳ), կ'իմանանք որ 1685 Օգոս. 5ին Սաղմոսավանքին մէջ Երեմիայի ձեռքէն առեր են Աստուածաշունչը և թոյլ չեն տուեր «բանիլ» կամ մանրանկարել: Երեք օր վերջ, Օգոս. 8ին Երեմիայի Աստուածաշունչին համար կ'երթայ Յոհաննավանք, ուր գացած էր նաև կաթողիկոսը իր հետևորդներով, ու կ'երևի թէ դարձեալ ետ կ'առնէ զայն ու Մաղաքիա նոյն վանքին մէջ կ'ամբողջացնէ անոր նկարները<sup>(1)</sup>:

Ամգեցի ետքէն մտերիմը եղած է Մաղաքիայի ու անոր մասին հետեւեալ յիշատակագրութիւնները ունի իր Օրագրութեան մէջ: Կ. Պոլիս, 1691 Յուլիս 6. «Քօմուրճու Մաղաքիան եկաւ ընդ Վահանին» (թղ. 148ա): — Նոյ. 28. «Երեմիա Չէլէպուն գիր՝ տղան (Մաղաքիան) զէջմիածնայ թապախն բռնելոյ, քանզի Գ անգամ եղեւ վասն այսր եկաւ եւ գնաց» (թղ. 153ա): — Նոյն Օրագրութեան կ'իմանանք թէ Մաղաքիա ամուսնացած և 1700 Մարտ 8ին մանչ զաւակ մը ունեցած է. «Մաղաքիային մանչ եղեւ» (թղ. 242բ, լուսանցքին վրայ): — Այդ օրերուն ան կը գտնուէր Հոռմ. Ապրիլ 16. «Մաղաքիայես իմ գիր ի Հոռմա. մեզ մէկ գիր, տանն՝ երկու գիր» (թղ. 243բ): — Ապա կ'անցնի Ալիկուրնա կամ Լիվոնոյ. Հոկտ. 10. «Մաղաքիայե գիր ի Ալիկուրնայու՝ Սեպտեմբեր Ե գրեալ եղիայ վարդապետէն<sup>(2)</sup>, չորս գիր ի մի պահարանի եղեալ» (թղ.

(1) Աստուածաշունչիս (Ձեռ. Էջմ. Թիւ 349) յիշատակարանը տե՛ս Ն. Ա. Կիսեան, **Չէլէպի**, էջ 39:

(2) Սոյն եղիա վարդապետի մասին տե՛ս վերը, էջ 2թ-2 ծնթ.: